

四庫全書

集部

欽定四庫全書

石倉歷代詩選卷二百四十七

明 曹學佺 編

元詩十七

成廷珪

丁千五歌

丁千五一百健兒如猛虎幾年橫行青海頭牛皮作衫
桑作弩射陽湖上水賊來白晝殺人何可數將軍宵遁

旌旗空倭甲蠻刀賊為主西村月黑妻哭夫東塢山深
母尋女屋廬燒盡將奈何往往移家入城府不是丁家
諸健兒仗劍誰能剪狐鼠樓頭醜酒齊唱歌爭剖賊心
歸釁鼓官中無文立賞功還向山東販鹽去

春夜曲

芙蓉樓前拜新月寶鴨微薰透銀葉吳山楚水送遠遊
不管閨中照離別誰家玉鈎飛上天一似連環舊時缺
缺多圓少將奈何方寸愁腸萬里結為郎白苧裁春衣

又恐月圓郎未歸

戚戚行

戚戚復戚戚白頭殘兵向人泣短衣破綻露兩肘自說
行年今七十軍裝費盡無一錢舊歲官糧猶未得朝堂
羽書昨日下帥府然燈點軍籍大男荷鍾北開河中男
買刀南討賊官中法令有程期笳鼓發行星火急阿婆
送子婦送夫行者觀之猶嘆息老身今夕當守城猶自
知更月中立

射鴨謠

阿儂手挽竹枝弓射鴨綠楊湖水東三三五五似學武
一箭誤中雙飛鴻前船唱歌後船哭月黑湖中夜潛伏
東海健兒不敢過人命幾如儿上肉老翁入縣前致詞
夜夜全家猶野宿丁寧門戶且勿開明朝又怕官軍來

衰老卒

白頭老卒衣欲穿日日織屨能幾錢點名去討海東賊
別家泣上城南船自云十五入行伍掠陣曾誇力如虎

賣刀買酒看升平六十年來不用武將軍醉即騎馬歸
猶散黃金教歌舞中原上馬賊更多白晝殺人誰作主
我今老去死即休白骨填海何人收朝堂昨日下黃榜
誰家年少當封侯

聞中原河決盜起有感

中元九月黃河水平陸魚龍吹浪起飛霜肅肅鴻鴈來
禾黍漂流桑棗死大風怒號揚飛塵白晝剽掠如無人
官軍不誅海東賊縣吏乃殺西村民夜聞羽書起丁力

老稚嗷嗷向誰泣我當六十將奈何扶杖淮南望淮北
辛卯秋旱八月晦日天大雷雨

八月晦日雷怒號大雨如注風蕭騷捷如鬼神撼山岳
湧若江海翻波濤屋茅重卷一重去河水忽漲三尺高
驚鴻翅濕飛不起散亂中澤呼其曹雲龍有意洗兵甲
下與蒼生舒鬱陶浮雲收歛赤日見天宇廓遠無纖毫
歲年不逢亦偶爾吾將種麥畊東臯

雪舟歌為王子中賦

王郎不知何許人一舟橫在江之濱風清月霽未肯出
滄洲獨與天為隣洞庭烟水兩寂寞十年不見君山春
北風三日雪大作挂席張帆以為樂手中鐵笛吹紫鳳
身上氅衣如白鶴拍浮滿載百壺酒企足篷窗供獨酌
剡中隱者母相疑乃與戴老同襟期更闌酒盡雪未止
趣棹欲返猶遲遲今夕何夕此乘興千載未必無人知

悲徐州

彭城八月風塵起數郡義兵多戰死良家子女復何辜

盡作黃河水中鬼，髑髏填海幾時歸。
千古沉冤無處洗，王師一日天上來。
樓船夜斫浮橋開，守橋將軍不敢敵。
狂瀾倒瀉聲如雷，三山回望平如掌。
野曠猶聞金鼓響，軍中少年當封侯。
爭入轅門請功賞，江邊老翁死即休。
血淚沾襟空白頭。

題畫史王彥麟卷

老翁窮居廣陵市，四壁蕭然祇圖史。
題詩不博一文錢，枯瓦磨窮空費紙。
不如鄉里諸妙年，翰墨遊戲王公前。

解衣盤礴作山水一幅寧惜千金捐何人最得滄洲趣
麟也于今稱獨步狂吟寄興肯相過畫我東橋竹居處
題笠澤金伯祥橫山墓所瞻雲軒

踞湖之上幾千尺下有蒼波通笠澤百年葉屋與荒丘
兩地相望淚沾臆親歿知幾年抱痛如一日孤雲飛處
最關情漠漠愁魂招不得魂之來兮雲下垂落月分明
見顏色魂之去兮雲亦空歛忽消沉竟無迹悠悠飛去
復飛來孝子之心豈終極我家揚州好墓田老作江南

未歸客天涯芳草又春深夢裏還家作寒食

槎山歌為胡雲夫作

淮水源出桐栢山東流入海何時還胡君引水種秋秣
築室正在槎山間槎山清空白日靜胡君意與雲俱閒
漢東一夕風塵起雲亦高飛幾千里山間有家不得歸
却過揚州飲淮水飲之為洗冰雪腸今我不樂思故鄉
驅車明發度遠道廣海又在天一方思親恨不歸來早
夢中祇說槎山好他年歸隱奉親歡白頭同向槎山老

雜興

野蔓被長坂秋花翳前林登高望孤冢涼露忽已深團
圓日東出瞬息還西沉吾親不可見哀涕淚沾襟徘徊
未忍去玄雲生夕陰

又

夜坐竹林下仰視天茫茫浮雲起西北衆星黯無光羣
鳥鮮因依胡為思南翔良辰忽變易志士徒感傷願爾
保素節何勞怨清商

送郭仲安貢察院

捧檄上京華清才素共誇封章不起草健筆自生花燕
市千金馬天河八月槎看君冠獬豸好為觸姦邪

六月八日

世事今如此吾生可奈何海東仍盜賊潁上復干戈苦
雨朝逾急陰風夜轉多白頭苦無賴對酒獨悲歌

曉出錢塘門

出門聊適意草樹碧紛紛一雨破清曉四山生白雲僧

樓緣嶺出樵，逕過橋分明。日重携酒來，澆和靖墳。

齋居

曉起坐終日，無人扣竹扉。柿因風落早，菊為雨開遲。稚子能賒酒，鄰翁許借詩。白頭無別計，空負聖明時。

登望江樓

長江不可極，岸幘獨登臨。潮信自朝暮，山光無古今。碑亭流水涸，輦路積苔深。欲寫興亡恨，西風萬葉吟。

寄美寅甫

山館殘花歇江樓暮雨餘長歌留客和短札倩人書露
葉懸青蔓風簾隱碧梧夫君隔河漢涼夜月生初

寄慈溪普天澤監縣

聞說慈溪縣官閒地更偏兩潮來海錯六月刈山田曉
塔天童寺春帆日本船何時瓊樹底花夕醉嬋娟

秋夜雜詠

平居在城市無夢傍江湖世事有今日生年猶故吾抽
書逢越絕引曲感吳趨隣吏邀皆醉歸來不用扶

賦林泉民

羣居傍城郭獨汝向林泉
亂世知誰在荒村只自憐
白雲棲晚樹流水界秋田
亦有催租吏敲門橫索錢

和謝雪波東阡道中作

淮楚紛紛際誰憐老逸民
一為吳郡客三見洞庭春
世路間關久侯門接納頻
麻衣猶似雪不敢浣縑塵

龐山湖泛舟過甯伯讓庄所

湖上足清晝雨餘生綠陰
扁舟到城近曲港入村深
野

叟頻相問郎君不可尋西庵肯分席吾亦老山林

寄愚隱智東堂

落日太湖上歸舟此磧沙百年同是客兩寺即為家
老竹仍多笋枯藤也自花何時結茅屋相伴老烟霞

舟中晝寢

蓬窓坐春雨偏與睡相宜襟被支頭穩茶甌破夢遲
昔年為客慣今日覺吾衰無限滄洲意令人有所思

題慶雲東竹水居

水光當戶白竹色上衣青風露涵虛室江湖入淨瓶林
稍閒掛錫月影靜翻經上觀何聞見秋聲出杳冥

秋日遊虎丘逢徑山元上人

攀葉樹層層茲遊記得曾到山疑是夢出寺忽逢僧短
簿荒祠酒生公舊塔燈留詩駭浮俗山鬼也多能

送李斯立

南國風塵滿西江道路難鄉人問家信津吏識儒冠短
髮何由黑孤心只自丹放歌聊縱酒努力且加餐

雪

閉門三日雪竹外轉蕭然夜色侵書幌春寒壓篆烟詩
題名彥後酒讓老夫先獨臥袁高士清風幾百年

夜過吳江聖壽寺宿復中行方丈

深夜扣禪扃天寒月在庭烏驚栖後樹僧掩讀殘經蔓
草風吹白枇杷雪洗青對床聽法語方寸愈惺惺

登靈巖山

木杪見浮圖盤盤一徑迂倚巖留客坐過嶺倩人扶野

色平如削湖光淡欲無殘碑不可讀春草沒龜趺

送澄上人遊浙東

浙水東邊寺禪房處處家千崖無虎豹二月已鶯花曉
飯天童笋春泉雪竇茶煩詢夢堂叟面壁幾年華

向遊龍井過南天竺登二老亭曾賦一詩

二老題詩處風流不再逢客歸黃葉雨僧住白蓮峯誰
謂山無鳳人傳井有龍白頭江海上今夕寄行蹤

三月二十五日過上洋十六保徐居士柯莊

趁潮深入港風急水西流沙潤輕沾屐橋低欲碍舟孤
花餘晚艷芳草亂春愁沙鳥應相笑衰年尚遠遊

吳中五日追念故友李時中李欽嗣有感而作
夢繞南崗北嶺雲一杯無計洒松筠世間我豈長貧者
地下君為不死人夜雨自荒張祜宅秋風誰郵庾公塵
于今友道俱凋喪落日江湖淚滿巾

八月十六日送張仲舉至秦郵驛是夕邵文卿
置酒雲峯望月

水驛官船晚未開，月明乘興且登臺。
揚州鶴怨山人去，甓社珠迎國士來。
千里何時重命駕，百年今夕此銜盃。
同君盡醉交遊地，為問秦郎安在哉。

送陳景川歸盱眙

第一山中風物殊，我欲買田來卜居。
風林把酒聽黃鳥，雪港掛罾分白魚。
富貴不來吾老矣，漁樵有約子何如。
可能久作終焉計，北海方修薦鶚書。

虎溪三笑圖

三老風流笑口開山中猿鶴亦驚猜攢眉入社謾多事
送客過溪能幾迴僧影欲隨秋水去虎聲偏傍石橋來
東林絕響今千載撫卷題詩愧乏材

寄拔實尚書

憶陪冠蓋集通津下士無由拜後塵曾和淮南招隱曲
得從天上謫仙人鷓鴣在列誰堪並鴻鵠高飛不可馴
遙想退朝香滿袖題詩還記竹軒春

二月十二日祭長男之墓

三歲女孫方學行牽衣隨母上新塋青春過眼少晴色
白髮向人惟哭聲醉裏狂歌聊自適夢中相見只如生
他年何處藏吾骨無限尋常舐犢情

寄烏古孫幹卿參議

紫宸奏對出班行畫省論思晝漏長三月不知燒笋味
一春還憶煮茶香幾人白髮黃花酒何處青山綠野堂
扶植皇綱在今日中原草木仰輝光

夜思

斗帳方床一布衾
睡餘推枕復長吟
青燈細雨三更夢
白首殘編萬古心
天上不知何歲月
城中誰信有山林
哀歌坐待東方白
短髮刀騷不滿簪

環碧齋

面面溪光護石苔
軒墀無復有塵埃
月涵虛白浮秋去
水泛空青入座來
漁釣兒孫多質朴
嘯歌鷗鷺不驚猜
我家亦住滄江曲
千箇簷簷繞舍栽

蕭萬戶野鶴卷子

肯著邊塵浣縞衣當時城郭是耶非
自離碧海三山去直過青城萬里飛
老去揚州空逸興何人沙苑脫危機
丈夫功在麒麟閣莫說仙家有令威

送謝芝甫赴山南憲

謝庭子弟多佳士荆國山川總勝遊
萬里捧書催入幕一朝撾鼓發行舟
玄猿啼處巴江夜白鴈來時楚甸秋
襄漢風流千古意為君長憶仲宣樓

東勾曲外史張伯雨

霞珮翩翩出洞天當時彷彿見癯仙幾年南國張公子
今日西湖葛稚川滄海塵飛丹幾熟玉堂人去榻空懸
林間載酒來相覓乞馮山經與世傳

送烏克童僉憲調淮西道

繡斧煌煌擁使輶才名煜煜在中朝甘泉調客河東賦
蓬島仙人海上樵風振紫山迎驛騎雲開金斗見秋鵬
澄清事業須公等桂樹淮南未易招

廣陵岳宮醮夜觀王澹洲高士歲事自登瀛橋

迎師入黃籙壇

濛濛雲氣濕霓旌
小隊紅綃鳳蠟明
鸞鶴舞隨行道影
魚龍出聽步虛聲
淮南高士青毛節
勾曲仙人碧玉笙
一路天風吹不斷
此身今夕在蓬瀛

送楊士先歸長安

落魄麻衣不受塵
黃金釋盡只清貧
新豐市上酒濯足
常曲城南花惱人
豪傑謾嗤秦逐客
漁樵能話漢功臣
清時未老丹心在
姑把長竿釣渭濱

阮子華所藏桃源圖

桃花流水似天台彷彿三生到此來
玉杵玄霜無處覓金堂秘室為誰開
滄州一夜生芳草陰洞千年長綠苔
何必誑人秦甲子漁郎祇見兩三迴

嶽官登瀛橋

疊石為橋跨兩涯只如平地入烟霞
銀河夜擲仙人杖碧海秋橫奉使槎
浴水先迎三島日隔闌遙見十洲花
月中時有簫聲過多是山頭聖母家

題山居圖

石子坡頭松兩株
水光嵐氣護幽居
山翁被酒愛騎馬
溪友放船來捕魚
秋色自隨黃葉老
野懷常共白雲舒
何時卜築如圖畫
竹下開軒更讀書

瑞雪為劉芝田賦

風捲寒溪漾碧沙
曉林驚見玉橫斜
人間風日不到處
天上神仙解種花
九地暖迴龍有穴
三山雲靜鶴無家
泛舟來覓芝田叟
留作山陰勝事誇

寄謝方方壺寫寄遙山古木

鬼谷陰陰苔蘚斑只除猿鶴伴高閒
丹光或在藤蘿外飢氣常留水竹間
每讀內篇消永日還將生紙寫遙山
衰翁可是無仙骨不得相從共往還

送孫從義憲史貢部

貢名書到拆封開正爾諸曹議選才
侍史閣中簾影動尚書天上履聲來
階墀伏謁人皆喜符牒鋪張手自裁
不有雄聲驚畫省可無清論達烏臺

送余廷心翰林應奉

楓葉蕭蕭江已秋
吳船三日住揚州
靛花深染青綾被
雲葉新裁紫綺裘
征驛馬嘶風滿樹
別筵人散月當樓
明年春鴈將書去
人在蓬瀛第幾洲

畫魚

生平蹤跡侶魚蝦
浦月山風滿客槎
曾向春盤登北鮓
更從丙穴薦南嘉
賞花釣得留詩友
折柳穿來覓酒家
萬里江湖清夢遠
于今空對畫中誇

送李唐臣調山南憲幕

潮落寒汀水欲冰
酌君何惜酒如澠
人憐狗監知司馬
我喜龍門識李膺
爽氣九秋橫楚澤
先聲一日到江陵
君行自勵青雲志
斥鷃終慙九萬鵬

夜泊青蒲村

黃葉飄飄秋滿天
數家茅屋更翛然
村中老人不識字
溪上小兒能駕船
薺菜登盤甘似蜜
蘆花紉被暖如綿
此中長得無宵警
春雨扶犁學種田

春日遊上方寺因過別業

今日雨晴山亦佳，散行聊復寫幽懷。
田翁入郭買春酒，野衲下堂留午齋。
老去任添新白髮，平生能著幾青鞋。
醉中天地為衾枕，却笑劉伶死便埋。

感時傷事寄張仲舉博士

邊報紛紛日轉頻，彭城猶未息風塵。
中原白骨多新鬼，浮世黃金少故人。
阮籍一生唯縱酒，季鷹今日定思莼。
河東鶴叟應相憶，落日悲笳淚滿巾。

次李希顏述懷韻

八月邊聲草木寒
愁來短髮不勝冠
諸公莫誚王夷甫
我輩終慙管幼安
酒券如山空好客
田毛何日再輸官
蘭陵溝上松無恙
還有孤猿夜夜看

登狼山醉題僧壁

白狼山頭僧卓庵
我躡飛屐窮幽探
麻姑又見海深淺
女媧不補天東南
危枝如龍固矯矯
恠石似虎猶眈眈
興來捉筆寫狂語
此身只合棲雲龕

題朱伯禮西邨草堂

愛汝西邨之草堂
罨塵不到堂中央
夕陽欲下山更好
大火未流宵已涼
隻屨也能來戶外
小舟剛遣繫籬傍
豈無百榼揚州酒
與子同醉歌滄浪

寄申屠子迪僉憲

先生舊德在甘棠
故老爭留住草堂
湖上月明鷗鷺浴
山中雨過薜薇香
數莖白髮終難變
一日丹心不可忘
出處獨翁全大節
千年青史有輝光

寄崔宗文

白髮無家七十翁
筇枝漫指在西東
不因避地來吳下
正愛看山入剡中
臺閣故人書信少
江湖狂客酒船空
老懷無限平生意
清話何時一夕同

寄蔡彥文掾史

鳳凰池上神仙吏
却是中郎幾葉孫
幙下豈無奇計出
床頭猶有異書存
防秋列寨山如戟
蒸土為城鐵作門
何限民間可憂事
老懷那得與君論

送陳性之崑山從事

只將從事寫前銜省檄風來自折緘六案更須勞彩筆
一官猶未換青衫風生海市朝持酒日落江城暮卸驂
我未識君空悵望恍如烟水隔仙凡

題王惟賢所藏盛子昭畫雙松繫舟圖

雲門寺前風物幽布襪青鞋吾昔遊蒹蘆盛酒待明月
舳艫載琴當上流長松並立幾千尺狂客一別三十秋
何當挂席過湖去東里草堂姑少留

重遊虎丘寺

海湧峯頭行徑微，芒鞋欲趁孤雲飛。
風高木客作人語，月出天王騎虎歸。
傑閣重樓遮隱見，寒泉古木相因依。
荒丘王氣豈消歇，干將莫耶千載稀。

題何德深溪南

宰相官之不受招，碧梧林巷自逍遙。
溪頭二月花先發，洞裏千年雪未消。
朝士過門時載酒，仙人飛佩夜吹簫。
社圖誰寫耆英會，還肯中間著老樵。

寒食日松江有懷廣陵

老來偏欲惜年華，春正濃時不在家。
江上苦遭寒食雨，夢中猶見廣陵花。
書藏舊篋應無恙，酒憶新樓不用賒。
日暮荒城聞鬼泣，東風吹浪滿天涯。

送秀岩上人歸日本

廿年中國遊方遍，看水看山念念非。
海眼枯時千劫壞，日頭翻處一僧歸。
黃梅雨打袈裟濕，白蜃雲隨錫杖飛。
富士巖前留語在，庭松西長舊禪扉。

同張仲舉夜宿寒橋

柔櫓聲乾破寂寥
青山磯下宿寒橋
乾坤萬事雙蓬鬢
風雨孤舟半夜潮
丹鳳不來秋已老
玉人何處水空遙
幾時重醉秦淮酒
細聽漁樵話六朝

李子英心遠亭

門外黃塵掃不開
何由吹得到靈臺
閒看倦鳥投林去
靜愛孤雲出岫來
彭澤高人多逸興
峨眉仙客有天才
祇今誰到悠然處
同采秋香共一杯

送袁季文赴帥幕

少年書劍學從軍
幕府于今氣不羣
白髮元戎多好武
青衫從事最能文
帳前草檄花如雨
江上維舟水似雲
把酒高歌成遠別
不知何處又逢君

南城暮春

南城雨盡午風和
二客相從步屨過
流水陂塘春事減
落花門巷晚愁多
銀瓶自瀉沙頭酒
寶瑟誰調陌上歌
莫寫江南斷腸句
賀郎憔悴髮空皤

周平叔夜宿崇明寺海雲樓偕羅成之隱君文
長老盧隱君以沙頭雙瓶為韻

天台老衲兩眉龐自起高樓枕石杠煮茗別開留客處
論文多近坐禪窓冥鴻散去猶相逐獨鶴飛來不作雙
明發仙舟上霄漢定傳詩話滿滄江

丘克莊敬雲樓

君家樓外雲如海五色輪囷掃不開每就月明簷下宿
更隨秋色座中來瓊臺夜鶴迷蹤跡玉女春衣費剪裁

看爾騎鯨朝帝所舉頭西北是蓬萊

題玉巖上人溪山野趣圖

流水淙淙石齒齒蒲庭雲氣欲模糊白鷗溪上秋多少
黃葉山中徑有無十月雨深漁屋破三江風急野航孤
年來難覓幽居處空向晴窓看畫圖

二月十四日風雨孤坐秀州城西僧舍

秀州城西春事微二月苦雨行人稀江湖渺然不可渡
風雨如此將安歸老來口腹胡為累亂後人民今見非

兼旬不得武林信倚仗南望孤雲飛

送馬令尹任滿

長洲赤子窮無告正賴郎官為撫摩
兵後人家猶耒耜日長官社有絃歌
越來溪上波聲小魯望祠前月色多
自古長才須大用薦書元不待常何

寄張內翰

中原不及舊山河使節仍煩涉海波
天上雲烟春信早江南風雨客愁多
諸公擬獻中興頌壯士寧忘勅勒歌

萬里相忘成永訣白頭蕭索奈公何

送羅成之移居崇明其子季通亦之本州校官
先生八月乘烟霧妻子同隨海上槎太守賓筵先肅客
廣文官舍即為家波濤浩蕩藏陰火島嶼微茫接太霞
聞說三洲多藥草可能無意到丹砂

送張明善歸武昌却移家入蜀

對酒悲歌淚滿衣楚天搖落又斜暉風塵萬里與君別
江海一舟何處歸老去且留吾舌在愁來長惜壯心違

臨岐不盡平生意沙苑無雲鶴自飛

送馬士瞻帥掾高擢

風塵如此送君行念爾才華獨老成軍旅未聞忘俎豆
掾曹多見到公卿滄江日射旌旗影紫閣風悲鼓角聲
玉麈談玄何事業雲臺圖像是功名

寄靜逸處士顧仲庸

環堵蕭然一室寬只除詩酒寄清歡瓶中有粟分寒士
袖裏無書上達官揚子暮年空識字龐公早歲已遺安

先生獨卧風塵表吾欲相從接羽翰

欲卜居海上未有定止先作寄紫步劉子彬

滿目風塵祇自憐輕裝已辦有行纜也知避亂依城郭
更欲移家傍渚田紫步于今無士馬滄溟何處有神仙
桃源只在人間世還許漁郎放釣船

送傅德潤陪將作同知武昌買馬回京

維揚館裏送軺車却算分攜八載餘天使出求沙苑馬
星郎厭食武昌魚數鞭已報克華廐上冢毋忘過舊廬

老我平生無駿骨應從郭隗借吹噓

送盛克明辟掾浙省移家吳興

十年三送滄江別此日分携又不同
辟掾遠移青瑣闥移家喜近水晶宮
勿論後會知何地且念離羣獨老翁
幕府郎官應問訊為言憔悴坐詩窮

和用子通助教同張元禎倡和詩卷

懶性何堪接貴遊長松之下每科頭
不能取友山中社更欲移家海上州
老去生涯情似水興來詩思澹於秋

玉堂傑作難為和白首狂吟祇自愁

送婁所性迴金陵別業

楚甸驚塵滿客衣古來賢達在知幾山中桂樹我將老
江上草堂君獨歸刁斗連城嚴肅肅旌旗垂野淨輝輝
金陵酒熟還相憶莫遣詩筒信使稀

簡西江宋子與令尹楊翼之李斯立二先生

八月涼風催早寒家山空憶路漫漫滄江無處問書信
白日何人生羽翰曉霧漲天迷故國夜潮流月到長干

諸君莫責王夷甫我輩深慙管幼安

寄盟禪師四十年前在天寧方丈曾有求賦毛

女者

短杖輕包歸去來水雲多處少塵埃一春海鳥依簷宿
五月溪蓮繞舍開雲外送僧歸日本月中携客過天台
衰翁不得瞻圓相猶望新詩托鴈回

送清淮叟上人遊五臺

鴈門西畔是靈山山作青螺五髻鬟春日花開殘雪裏

僧房人在白雲間，善財參問何時還。
淮海清公更瀟灑，早將聞見動禪關。

送廬山高齋赴南康監郡時兵火之餘在吳城

山開司

公昔騎驢下星渚，前身恐是匡廬君。
孤城遺老窮無告，太守真符喜見分。
彭蠡帆檣明夕照，吳城旌旆拂秋雲。
明年春殿論功賞，傳奏先將姓字聞。

和李克約東臯雜興

一春開遍雨中花幾向東園管物華老去始知身是客
愁來空擬醉為家江樓簾箔霏香霧野寨旌旗絢采霞
曳杖歸來還自笑夕陽原上數殘鴉

芍藥花開江雨晴幾時重作看花行松間携妓從教俗
竹下留賓也自清一夜春愁無處著三分月色為誰明
貧家亦有琴堪典好把平生意氣傾

閉戶拙於公是非似與江湖踪跡稀酒中從令客罵坐
甕下却念兒啼飢松江之鱸固可食沙苑有鳥宜高飛

干戈滿地正如此萬水千山何處歸

挽郁謙德處士

白首其如死別何臨風老淚若懸河耆英社在晨星少
禪智山空夜雨多薤露莫悲人換世桑田曾見海生波
殞宮空對棠梨發更擬重携濁酒過

甲午除夜有懷孟景章

夜窓兒女笑燈前亂世安居又一年鄰甕且分藍尾酒
客囊從換折腰錢凍消屋角簷簷雪寒壓爐頭楮枲烟

安得重陪孟東海劇談終夜不成眠

王彥芳御史綉榮堂

色絲不染胭脂井銀漢綵成五色紋織女機中翻海水
諫官衣上綉春雲清嚴地位人誰到錯落天章手自分
他日錦歸當白晝江花江草亦欣欣

僧惟善駙馬野雲亭

萬里飛來廣漠雲隨時舒卷故繽紛風中不見孤飛迹
日下都成五色紋從爾所之占隱者更堪持以獻吾君

明時用汝為霖雨先向東南洗惡氛

和崔元初秋日舒懷感時叙舊情見乎辭

瀟洒君家錦照堂石泉秋水煮茶香沿池篠蕩枝枝潤
當戶蒲萄葉葉黃東館壞垣塵漠漠西城殘照晚蒼蒼
春時數聽尚書履幾送池邊月色涼

六月書所見

干戈滿地起風塵民物凋零府藏貧黃犢烏犍烹作食
雕梁畫棟折為薪江淮經理須賢俊草澤誅求到隱淪

謾道寬心應是酒老夫三日未沾唇

澹香亭

幽芳不自媚白日淨依依風露已如此
山中人不歸

題宋子章竹

黃陵只在斷雲西苦竹叢深望欲迷
帝子不歸春又晚
滿林烟雨鷓鴣啼

徽廟御畫梔子白頭翁

梔子紅時人正愁故宮衰草不勝秋
西風吹落青城月

啼得山禽也白頭

客中久雨

水滿行厨欲產蛙
苔封老屋亂啼鴉
南風十月黃梅雨
開盡冬青兩樹花

送劉將軍致仕歸襄陽

當年鐵馬渡襄江
敵國聞風夜納降
今日却歸江上去
峴山青滿讀書窓

春夜

酒兵無力破愁城春盡空山杜宇聲敲缺唾壺眠不得
半簾花影月三更

青山白雲圖

不見茅齋舊隱君
遶溪烟樹暮紛紛
斷橋水滿無人渡
誰向青山管白雲

墨梅

東閣衝寒雪一枝
巡簷偏解索題詩
何郎老去風情減
羞見踈花照鬢絲

夜宿野城

露氣涓涓月二更小舟猶向月中行
前村知有人家近隔浦微聞犬吠聲

畫馬

圉人曾喜得驊騮撥入天閑早見收
今昔有誰憐駿骨西風沙苑蒺藜秋

武林客舍

窓外青山啼子規吟竟正被酒禁持
小樓一夜雨聲惡

落盡碧桃人未知

綠楊橋

長溪春漲碧溶溶
烟雨空濛濕采虹
何事吹簫度清夜
斷堤楊柳月明中

題高房山墨竹

黃花山主澹游翁
寫竹依稀篆籀工
獨有高侯知此趣
一枝含碧動秋風

題張天民先生移居圖

舊隱荆溪第幾村
手栽松檜至今存
大茅峯下千年鶴
遲汝重來問子孫

高昌王所畫蒲萄熊九歌藏

玉關西去火州城
五月蒲萄無數生
今日江南池館裏
萬株聯絡水晶棚

青山白雲圖

溪上長松已合圍
草堂無事客來稀
濕雲生滿東山路
日暮野樵何處歸

唐明皇吹簫圖

寢殿春深晝漏遲
榻前侍女立多時
玉簫自按霓裳曲
賜與梨園弟子吹

題蒲塘雙燕圖為劉小齋作

昭陽池館晚風微
花落巢空去未歸
却是蒲塘春水濶
年年還傍小齋飛

竹枝歌

道士莊前秋事多
東家西家收晚禾
船頭把酒對明月

聽打夜場人唱歌

訪王伯純晚歸

長洲苑內舊池臺
白髮山人又再來
無限客愁渾忘却
小樓聽雨杏花開

和饒介之秋懷

夜半金烏海上翔
行來夾日酷於霜
庭前幾箇芭蕉葉
未到秋分一半黃

鐵鎖滄江第幾關
揚州花竹夢中看
也知無賴三分月

照見沙場白骨寒

題南竹

洞庭南去竹如雲老葉新稍亂不分
帝子不歸風雨惡
深林何處覓湘君

右成原常集借自徐興公家藏古本
頃坊刻有成禮
執一冊豈廷珪別字耶因選附之

燕中懷古章貢侍御

娉婷二八女絕色妙難畫
新粧薄鉛華照影脩竹下
盛

年事夫媚錦玉輝精舍雖非伯鸞妻惓惓惜春夜琴餘
月當軒默默倚風榭寄語東家兒紅顏莫輕嫁

送李子威代祀嵩衡淮海

羣生望甘澤五岳雲氣通天香落岩谷瑞靄春冥濛海
潮天際來金碧森萬峰劃落紫翠堆亭亭玉芙蓉古廟
絲竹存迎神奏黃鍾空山遞餘響落花舞青童

送周草窗尊師歸廬山太平宮

匡廬之山仙所居銀河倒蘸青芙蕖三千里路昔一往

十八社友令如何向來匡君結廬處至今海月懸高樹
水流花落春復春洞府蒼茫隔煙霧西風蕭蕭吹短衣
賣藥脩琴不歸去潯陽潮落海欲枯幾時再得麻姑書
桂風不跨林下虎回仙肯顧盤中魚幸留神物守丹鼎
喜近弟子迎飈車世間信有揚州鶴看汝乘之上寥廓
晴窗須理白雪絃爽氣仍開紫霞閣袖中寶劒且藏鋒
彭蠡小龍方睡著

射鴨謠

阿儂手挽竹枝弓射鴨綠楊湖水東三三五五似學武
一箭誤中雙飛鴻前船唱歌後船哭月黑湖中夜潛伏
東海健兒不敢過人命幾如几上肉老翁入縣前致辭
夜夜全家猶野宿丁寧門戶且勿開明朝又怕官軍來

湘江秋園圖

蒼梧愁雲拂煙水日暮無風波自起何人吹簫作鳳凰
被髮臨江迎帝子黃陵女兒情更多却掩冰絲淚如洗
千年遺恨人不知坐對空山疑夢裏

韓致用夢鶴

疇昔相過赤壁磯神交遺思尚依依應從五色雲中過
還繞三株樹上飛月色滿庭空夜帳露華如雨濕秋衣
蓬萊山下花無數遲子吹簫作伴歸

送人歸桐江

讀書不謁萬乘君挾策肯傍諸侯門嘯歌蘇臺晚山碧
濯足洞庭秋水渾千金未易買駿骨一飯豈足哀王孫
風塵拂衣且歸去高卧桐江煙水村

九月十日自壽

余生堪歎復堪憐
喜際明時老市廛
把菊已從前一日
種桃猶待後千年
但令有子親書帙
莫怪無人送酒錢
寡欲清心今得矣
煉丹何用學神仙

宿鶴沙張氏草堂

草堂借我作行窩
杖屨頻煩太史過
滿地白雲清晝永
隔溪黃鳥綠陰多
銀餅自瀉山中酒
鐵笛誰翻小海歌
今日逢君須盡醉
西家亭館柰愁何

寄周平叔先生就求蒼耳子

周侯久不通書問夜滄江入夢頻五月採來蒼耳子
幾時分送白頭人沙頭酒熟田毛足港口船過海錯新
南北相望千百里老來幽獨倍傷神

送智隱住水月禪寺

放船直到栖禪處萬頃湖心一鏡開綠樹鳥驚風落果
碧潭龍去水生苔西巖尊宿傳燈在東海高僧杖錫來
今夜月明清似水大空無地著纖埃

石倉歷代詩選卷二百四十七

欽定四庫全書

集部

石倉歷代詩選卷二百

四十八至
五十

詳校官庶吉士臣范逢恩

侍讀臣孫球覆勘

總校官進士臣朱鈐

校對官庶吉士臣潘庶筠

謄錄監生臣童超

欽定四庫全書

石倉歷代詩選卷二百四十八

明 曹學佺 編

元詩十八

洪希文

琴枕

至音何寥寥古道行古心枯槁斲為枕用枕體乃琴虛
中具微軫簧舌韶濩音操之當薰風不僭雅以南吾聞

古巢父遺瓢掛空林有形即有累湛若止水沈所以魯
東家曲肱意彌深

送林景惠和興化教諭

朝遊夾漈山漈水何漣漪暮登石門山山石亦差差水
石太古色山人去何之君今遊此山為余訪頽基多謝
吹藜翁七畧今有歸矧茲十室邑文獻猶庶幾君子樂
育才薪樵理不遺白袍久延佇雪立風披披煦之以惠
風暢若春陽熙前程雖云邁來者猶可期

貧甚食草具作

赤莧赤如脂苦費甘如飴盤登惡草具味等薇與芝賢
哲逝已遠昧昧余所思伊人既忘世此外皆若遺梁肉
世豈乏飽死黃牖兒千金渥注種歲晚鳴枯萁尚餘耽
書癖不與塵土緇此樂豈在外簞瓢猶山雌

枕簟入林僻

朱夏困蒸鬱城市多淫哇閒招嘯雲侶來食山中霞山
中有何好泉石端可嘉清溜接窻筒火種憐菑畚枯松

偃澗壑赤日流丹砂茂林無珍禽皆井空謹蛙桃笙寄
憊憊菊枕便昏花煩襟頓消釋密蔭爭交加羲皇有神
交遽廬等仙家久坐令人健微吟到日斜浮雲蒼海狗
岐路常山蛇祥飈偶披拂哀音餘慘澹山深民多醇隣
酒亦易賒去去下巖扃歸途暝棲鴉

龜洋僧越浦造寧海東際橋姪清甫為求詩以

壯其事

我昔携二客涉此春江潯春江渺無際下有魚龍吟行

客日已晚夾岼菰蒲陰滄江見舟子招招勞余心我家
山之陽我友山之岑懷哉不得往黃鳥鳴空林向微塵
外人慨此將焉任欲成萬歲功豈憚歲月深刺手斲巨
鼇象址重淵涔雲濤鼓韶濩共爾澆煩襟吾鄉鄒魯鄉
人物多華簪寥寥識緯語桓譚非所欽為謝金仙子氣
化無古今逝將紀江漢相國生自南

送黃仲復雷卿任三山學錄

漢廷購宛馬善肆空學校選入飛兔羣一躍猶變豹近

者八鄉達往往皆職教去作他人師炙轂轉高妙臯比
橫講席鶴俸供廩稍瞻視凡馬羣尾大固不掉君為汗
血駒銀鞍追駮驃淺飲合沙流時來即同調

續聶夷中傷田家

貿貿丘麥秀蝻蝻吳蠶生微行執懿筐亦既受厥明上
焉給王賦下焉紓官征豈為飢寒念所念瘡痍平哀哀
生理窄了了無餘贏惻怛夷中詩萬古田舍情

壽峰館所擬古問訊光孝東溟講師上人

棲息無塵雜滿目雲舒舒別來雲間人賴此可與娛情
親跡自遠道合人豈踈回首自怡悅無心覺真如

曉行途中書事

冥發昧所適東西覺惘然門敲村店酒鐘落客津船猿
叫荒山月難號墟里煙回思在家日日晏尚高眠

穫稻

雲散水微茫千畦萬隴黃罄腰勞日少鼓腹樂時長處
處聞雞犬家家足稻粱太平本無象新釀甕頭香

題聖墩妃宮湑洲嶼

我昔纜舟謁江干曾覲帝子瓊華顏雲濤激射雷電洶
殿閣碑兀魚龍間此洲仙島誰所構面勢軒豁規層瀾
壺山峙秀倒影入乾坤擺脫呈倪端粉牆丹桂輝掩映
華表聳突過飛巒湘君小冰刃靈骨虞帝跡遠何由攀
銀樓玉閣足官府忠孝許入巫咸班帝憐遐取雜鯨鯢
柄授水府司人寰五雲殿邃嚴侍衛仙衣法駕朝天關
危檣出火海浪破神鬼後使忘險難靈旗耗筆廣樂振

長風萬里翔孔鸞平洲遠嶼天所劃古廣不獨誇黃灣
至人何心戀桑梓如水在地行曲盤升階再拜薦脯藻
不以菲薄羞儒酸日談書史得少暇石橋潛度凭雕欄
詩成不覺肝膽醒松檜蒼蒼鳴玦環騎鯨散髮出長嘯
追逐縹渺乘風還

春寒無炭

古人坐客寒無氈我今為客寒無煙東風兼領玄冥權
今年春寒過去年梅子含酸實未堅薺麥雖茂胎未全

海棠羞澀開紫綿山南山北無杜鵑詩翁縮頸聳兩肩
玄龜守殼凍不前吟成呵硯冰尚堅毛穎塞澀非張顛
喚起石鼎句再聯倚牆道士鼻息喧此時得酒真解仙
博取一醉真可憐君不見雲安斗水直萬錢杜陵雖老
性命懸晝灰對雪思悄然忍寒披絮夜不眠牛頭何日
雙錦纏

飯牛歌

牛吒吒蹠趵趵枯萁嚙盡芳草綠自脯薄夜不滿腹擷

菜作糜豈作粥飼飢飲渴兩已足脫紉解銜就茅屋不
愁飢腸雷轆轤風簷獨抱牛衣宿丁男長大牛有犢明
年添種南山曲

惜春吟

去年醉倒百花傍旁人拍手笑我狂今年花酒兩無分
一春正坐讎書忙先生讎書未肯出詠柳題花閒度日
朝來著步花已空搔首東風長太息

聽琴歌

疎簾曲檻蘋風涼細腰美人藕絲裳神閒意定丰度遠
玉指纖纖彈履霜喬林鶯轉日卓午幽澗泉鳴夜未央
孤鸞別鶴生暗恨母以冰炭置我腸

夏白紵

水晶宮白銀闕髮如青雲眼如月白紵為袍巾勝雪思
君起舞清歌發秋風落木雁南飛太息遊子何當歸桐
絲指下音調稀雙雙玉淚彈珠璣

壽峰翫月

素娥准勅六丁擎下照塵寰似水晶河漢無雲天萬里
溪山不夜月三更蓬萊弱水何曾隔玉宇瓊樓無此明
今夜壽峰峰絕頂與君端坐細推評

守歲

掃退陰凝萬瓦霜儒家守歲似如常沈香已帶寅前氣
臘酒初聞子後香凍雪驚春先瀑竹祥雲夾日上扶桑
熙熙民物皆生意天建皇疇福萬方

清明遊陳氏園亭

村村花柳暗晴川百五時光不暫延
綠暗園林尚佳節
清明亭館自新煙
喜逢熟食傳遺老
怕著新衣學少年
惆悵東欄花似雪
人生底處勝樽前

春晚同數客遊靈巖廣化寺書所見

塔外青山匝四圍
澗邊流水繞松扉
白雲一塢僧長住
紅杏數枝春漸稀
雨足人牛耕曠野
山深鳥雀哢晴暉
長廊響屨皆明禁
口自忘言心自非

明皇太真避暑按樂圖

已剖冰盆金粟爪旋調雪水試涼茶宮娃未解君恩煖
尚引青罍汲井花

書傳德陽教授所居精舍

洛陽城裏王侯宅光範門中宰相書何事春風渾忘却
莓苔還似野人居

幽居

柴門掩斷徑生苔坐閱東君幾往回看盡牀書無客到
殘花風送過牆來

恠石

欽歎雲雷來月窟
翥驟虬鳳下天台
漢唐池館多禾黍
何似山林卧綠苔

石倉歷代詩選卷二百四十八

欽定四庫全書

石倉歷代詩選卷二百四十九

明 曹學佺 編

元詩十九

丁復

有鳥

有鳥有鳥鳴聲嘒嘒自東有居則西于巢有翩者翼載
戢載翹害往害否中心搖搖有鳥有鳥鳴聲孔悲生此

東隅息彼西枝有翩者翼逝將奮飛我行遲遲莫知所
依維東有山領路其岐維西有江湍流其支伊此之懷
復彼之思莫知所之我心孔哀昔我來思狐裘披披今
我何為絺綌有淒譬彼行驥有繫其馳言提其袂載泣
歔歔相彼鳴琴匪絃伊絲哀于塗人宜莫我知聖或弗
濟伊命也而命也如茲我行其隨

送劉士幹知事赴湖廣省掾

衆羽之差差彼翰而鳴衆趾之離離我獨于夔夫乘而

往我徒于追波濤洶洶則匪于江彼陸康莊則舍而杭
我聞瞶瞶我視于盲爾牽于驅愛馬其駒爾行徐徐於
余焉居我有旨酒聊樂與娛

送章子端調浙東奏差

維山其阻維水沮洳孰來予蘇使君之車岨則有阪使
車無反沮洳有衍伊澤斯遠維澤伊何孔碩洋洋我攸
樂康使車彭彭維騶在隅弗疾其驅彼華紆徐維章子
之裾維山斯岨維水有潄章裾楚楚實獲我所楚楚者

衣肅肅者儀亦永其依我逸以敖娛

甘雨昨日足

甘雨昨日足今日豈不游文漪散清沼綠樹未驚秋步
出西郭門浩浩江漢流危檣隘川浦乃有遠人舟江租
赴海漕驚沙無定漚號呼走羣吏肉食懷鄙謀及時不
歸耕卒歲何用周悄悄綠髮子還家多白頭為農極凋
瘁猶用苦誅求

送趙有章教諭滿還郎步

昔在秋浦還我行凌浩渺尋君郎川宅相逢武林道君
顏日方滋我髮初未皓及茲陵陽見顏髮非昔好故心
無淺交論詩有深造兩意正云云遠別何草草長恐重
見日復此同衰老相知在久要良用豁懷抱

懷抱何以豁志士懷其衷文興諒斯際道在詎無庸雍
雍麟虞化秩秩鄒魯風菁莪歌樂育芹采有遺功持茲
從所濟誰謂行未通我生胡不遇亦云適其逢顏稷千
載人趣異心乃同勗哉戒脩途庶言玉爾躬

竹山

離離鳳食幹繇互亘脩巒君子懷靜儀虛貞媚蒼寒靈
厓發潛穎崇芭闕幽盤筮鄰從蔣詡永結求羊歡

同縣尹張志道徵士黃觀復陰秀才燕集六縣
校官葉仲庸池上分韻

江水秋未清林暉午能碧相忘散亂坐幸老談笑劇以
君久寒氊且爾暫暖席同心勿辭飲况有陶彭澤

右得碧字

王日不注官從天得長暇年衰豈能高老坐不許下新
秋席為展欲夕尊未罷誰揮魯陽戈請駐羲和駕

右得下字

次韻鄭復初錄事秋夜三首

漫漫秋夜長時蟲號四壁出門天宇高仰見河漢白在
世亦有道胡乃自偏側寸心寧中居萬物終我役雞鳴
夢茫茫不知誰舜跖

涼涼秋夜深時露沾重衣志士不在飽詎復懷饑饉啼

姑怨衰藂煥景淒已微屈父從遺則宋玉有餘悲馴致
諒以道爾亦安爾為

寥寥秋夜高時物得其心榮華無終玩衰悴遞相尋微
月流西極東溟足幽陰客為哀商奏弦促憂思深揮置
各就寐已亡人與琴

贈危觀

凍雨洗餘雪值別龍河上借酒支公房持觴竟蔬餉龍
河水南注西逐秦淮流海潮却南上送客有行舟向來

撫州門永懷臨川彥大兄金陵遊市西忽相見聞名未
識面各復十五年為驩兩何如綠髮慚華顛前年水門
餞金臺煩寄詩遙希九成奏長憶五彩儀周旋子長志
浩蕩太史筆召對會有時歸來定何日令弟惠連行客
食曹公魚既領臺官薦還持府掾書庭樹長年青池草
亦春碧自可緩羈絆胡然動離色在古有貧仕居卑且
娛親不聞刀筆起竟是廟堂人狗道獨所期趨時無一
好老夫終荷鋤春蔬灌園早

快翁上人還吳中

秋江夕雨霽微涼生綵衣雲滅青宇空北鴻衆已飛鴻
飛向南去而我獨不歸我歸復何所長蛟臥寒浦將擾
東海龍且騎南山虎南山虎白額具區濤可驀題詩悼
夫差具禮謁泰伯麋鹿猶故臺草青霜未白亦知舊鄉
好奈何懷遠道佛國煙霞深錢唐早晚到靈鷲天竺來
虛閣乘飛嶠白猿宅幽深祗許胡僧呌憑君言許由楮
策北峰頭月中下桂子腳底天香浮忽望凌霄道餘杭

第幾嶠

題鏡開亭

方池開淨鏡湛水涵虛象空光納朝陽承塵澹清漾時
以感物故至靜含動狀還將觀物心宴坐池亭上

送周士德還北

東風吹花繞白門南人送客開綠尊綠尊空盡客當發
白門惜別花無言周郎挾書南州讀濯髮春江水如綠
功名早年一唾手鄉里老人皆刮目巍巍廊廟急需材

明日辟書天上來鳳凰翩翩下千仞羽翼五彩江南臺
南竹有實梧有樹歸飛即向岡頭去霜風一肅天地春
鬱作雲雷散霖雨老夫借屋鄰僧房門前蓬蒿十丈長
目力苦短耳力强喜聞斯世登虞唐

題畫馬為方遠上人賦

上人超世資脫然了無為猶有愛馬癖或比道林支天
馬由來出天池西大宛國乃有之房星寫神孕龍髯雄
志倜儻精權奇飛行激駛電莫追空塵留煙不得窺月

氏之子那敢騎漢武遠慕穆天子欲齊崑崙遊具茨遣
使先開玉關道鳳頸虎翼初就羈王良造父死已久當
時不知馭者誰唐人為馬置馬監奚官果是何物兒況
復教之作馬舞跪拜起伏取笑娛伏仗能鳴輒引去俛
首低摧青絡繹欲從駑駘服轅下局促動遭箠策施非
徒喪志失天性病骨瘦柴如宛錐所以韓幹為畫肉不
忍神駿成凋羸大漠茫茫天作屋飢斲飽臥驕且馳蒲
梢肅颯輕風度苜蓿參差新雨滋胡為束縛對廐養長

嘶無聲情內悲

送孟久夫遷內臺掾

陽鳥本是日中物下來古柏棲冰霜南枝不如北枝好
北枝近日揚清光揚清光散朝彩鳴鳳高岡久相待天
涯亦有鴻鵠羣莫使冥飛向雲海

寶鴨曲

銅池織風翠波躍睡足煖煙饑不啜重簾未厭雲水姿
華屋清深寄閒絕生硃剥花紅錦翅枯烟半濕薔薇水

寶燈夜縣琉璃光恍若淡在滄浪裏方筵慢舞得嬌嬈
指痕臙染羅紋細就中恐有絕纓人誤識韓郎衣上氣
古聞烏化之言豈虛語願學飛仙作雙去

題鎬堯輔觀瀑圖

鎬侯校書天祿罷向人輒作山水畫長巒老樹翠葢欹
轉瀑崩巖練花瀉玄冠白袍問子誰濠梁漆園忘世者
京都塵起碧於雲炎洲瘴來疾如射揮毫定憶龍河上
挾颿久睨匡廬下

王將軍歌送瑞卿之荔浦巡簡

青天白日散五雲酒酣起別王將軍嶺右湘原五千里
君恩如天無遠邇百丈牽船上湘水蒼梧九疑雲旖旎
荔浦更在雲南頭砦中小官君莫愁生猺亦是天所產
賦予五性為人儔渠豈不知官好惡怒則猖狂喜還樂
近日大官虎瞰之骨肉可羹髓可酪我官我強民爾弱
是乃不堪兇性作前年道州殺人去太守萬戶走無路
賊去官歸歡聚醕彼亦那知其故將軍舊是廣東使

屬州被患往相視此迹彼情知久矣今官况是搖之方
山巖迫小官無房未足展仁化但用謹備防出入買賣
無相妨往來見之等尋常殷勤趨庭使下拜喻以天子
仁聖臣忠良

送李光大之海北憲司書吏

我聞徽之黃山秀之聚三十六峰比如故支而散去不
可數周環紆餘蛟鳳舞瘠之為石天所斧真宰重惜保
其故仙者不得開洞府李君乃生貌清古殷彛周鼎冰

雪貯而有錦繡之肺腑丈夫用世當不負他年抱策上
京去蓬萊宮深隔煙霧弱水三萬不可度祭酒先生纔
見取忼慨登樓念鄉土奉檄南歸大江滸古木陰陰覆
韋布御史殷勤再三顧叩之使言見平素小却黃堂掌
書簿溷溷泥途塞中路白壁自持終不污前年妖墓月
更吐天下秋風吹桂樹炳豹文章墮羣瞽八月錢塘潮
亦怒竟無愠色向人前但道命耶多謬誤行臺二十四
松廳衆更奇之交愛護百鳥啾啾徒下處一鷄空中肆

高舉憲司十道虞有罟紀綱庶政祛殘蠹三在炎荒鼎
而柱五羊八桂窮險阻基分南北海為部民黎雜居性
豺虎俗嗜相殘輟負弩濱水而採名蜚戶一從孟嘗去
合浦珠不更還遠無賈臺官擇人如善估以君政似王
夷甫長干置家坐空窶遣佐繡衣蘇病苦君今此行人
共許還珠奚翅瞻三語夷齊有心當弗沮君其勗諸報
明主道命之行澤施溥萬鍾之賜安厭予

送黃學錄歸番陽

有番之山差哉而欽寄連峰結絡如旛旗或為菡萏芙蓉枝或似長人善須眉高冠大服佩委蛇或以蒼蚪奮角鬐下赴巨浸長雲披九江彭蠡繞其側波濤盪擊而綿彌蒼蒼斷嶼如落星點綴碧落影倒垂行人裹糧備爨炊片時竟月不可期山中美茹多紫芝山中之人歌自怡

題句容趙氏松磎堂

愛客趙公子春登松磎堂展席翳長蔭臨流進餘觴陽

漪動五色天聲散幽篁無謂山笛詠此樂殊未央

題秋江晚渡圖

白雲在青山紅葉爛無數亦有東青枝長松共如故茅
堂當樹間江光澹凝素扁舟不可呼誰令汝來暮

讌郭氏池亭以杜詩荷淨納涼時分韻

空光皜虛明水色綠以淨短柳煙未深弱荷風不定華
觴勸行數綺席肴俎盛故人禮意殊衰暮懷感并臨虛
結清構曠景爭獻納幽禽故時來上下相命答月照金

屈卮顧影光陸離留賓已投轄不醉將何為

題稚川山水

江光如空山在天好風佳日散晴煙綠陰成蓋崖樹連
野橋楊柳亦娟娟擔簦之子何促速况有荷杖當我前
茅堂獨坐豈待客或者傲兀忘流年又疑浣花溪上叟
索句未得掩兩肘對樹不語胡為然將非得詩不得酒
耐可有酒無詩篇荷鍾歸向南山田陶公種秫五十畝
往往為酒愁無錢

題昭君圖

曲逆老失計婁敬因自侯深宮如花人遠嫁龍沙頭龍
沙萬里遠遠嫁不復返長思漢宮中淚痕日在眼淚眼
不可止嬌姿看轉美琵琶寄深怨繁聲紛在指

送秦元之赴太禧同僉

君家好兄弟聖主自知之周爵推秦仲虞官舉伯夷萬
方天浩蕩五彩鳳威蕤宣室虛前席蒼生屬論思

金陵送人還武昌

相送白鷺洲因思黃鶴樓遙觀鄂王蹟重起禍生愁西
上不可得東關曾獨留江邊趙佗石歲月但空流

題程先生西行集後

峽束水如箭已行船上天亂離豪葬後衰老秣歸邊手
把西行集心追北上年東風故山淚落日灑江煙

登高分得疊嶂

遠近不可數淡濃渾自成人煙諸崦隔鳥道半空橫日
夕黃微映江寒碧倒生憑高共臨眺憶得在宣城

送李御史

南臺鐵冠舊西府繡衣新吏部冰霜曉皇家雨露春三
苗蠻作俗八桂嶺為鄰虞帝猶遺廟殷勤薦渚蘋

送谷經歷之淮西憲幙

淝水綠逶迤淮山青陸離江人清共遠沙鳥白相宜百
鍊真金在孤忠聖主知幕蓮非久地臺柏有高枝

送賈西伯

西風苜蓿花南客又移家此道寧無用吾生未有涯峰

青宜霧日潮白逆江沙猶憶南樓夜吹簫度歲華

輓許覃峰

失訪松雲隱哀吟薤露歌前朝諸老盡浮世百年過山
水高情足詩書遠澤多何曾入城府秦鑿自寒波

送張克讓

秋花白露芹鄉郡萬山雲官冷難為滿囊空政喜聞灘
船牽月上嶺路入閩分有客來書辟青霄記雁羣

送王伯庸赴石埭板官

先生官已冷縣僻冷於官坐席嵐歸潤琴堂月過寒奇
峰花作朶幽瀨玉為湍所喜無迎送高吟寄碧瀾

送李景初試吏淮陽便養

讀書初試吏捧檄且娛親當代推經濟何人獨隱淪河
兼淮海遠霜蒲渚城春里舍多凋瘵周旋及撫循

送客

馬帳朋方集麟經講未殘幡然懷故里誰此障狂瀾黃
卷秋檠短青羶夜榻寒好將池草句題與惠連看

送人省親

子仕親亦喜子歸親更歡江湖片帆遠風雨一壺寒沙
鳥行秋渚江豚拜午湍莫看松桂色容易厭時官

送翟彥敬陞中臺察院書吏

名彥登烏府清門可雀羅辟書催北上行李及南訛天
濶涼雲積江明暑雨過東門羣椽集更起續離歌

題李息齋枯木竹圖

霜柯洞庭寒露葉渭川冷幽人美清夜獨寫秋燈影

題牧牛圖

邈爾三尺童御此兩轂鯨春風笠底回前村燒痕綠

題畫

青山多白雲佳樹雜芳植伊人不可招關路日已夕

賦山上松送常上人

松生在山上垂柯蔭其下人生苦別離念此歲寒者

新寺和張仲舉兼次韻

天宮兜率下崔嵬結綺交䟽面開地勢周圍龍虎國

鐘聲踈應鳳凰臺鼎湖仙去秋遺劒笠澤僧歸夜渡杯
千騎巡街羣樂動五雲深處御香來

雁門送楊仲弘姪士耕歸龍泉

伯也未入玉堂日我亦忝薦金閨名三千里外嗟淪落
二十年餘異死生猶子初從雁門見故鄉能作龍泉行
腸斷東門別小阮索詩相送若為情

江迴彭蠡天與碧路入臨川山復蒼令尹先為武進縣
絃歌况逢君子鄉黃禽雙啼白日靜綠草自動春風香

巾車數問虞夫子未慙元亮在柴桑

越州景德寺鏡清方丈題醉先

宋僧名也

岳麓圖

鏡清方丈見岳麓堂虛咫尺行江潭樹木連雲巖影濕
樓臺隔日水聲酣皇英雙騎龍上下蒼梧九點天東南
道人得我千古意復遣老夢登嶠嵐

送美上人歸臨川

白雲不生華蓋峰青天淨倚碧芙蓉上船不計日多少
到寺更行山幾重木客試人騎出虎淵靈求法脫為龍

莫貪石室跣趺穩偏長松門薜荔封

次韻答惠長老

棄為狂士幸相容敢向明時嘆不逢明月近人閒傍水
白雲邀客更登峰百年耳厭咸陽犬千載神交劔浦龍
車馬滿街門映燭夢魂初熟蔣陵鐘

九月一日遊昭亭

在宣州

山色江光帶近郊道傍楊柳舞寒條半生九日黃花酒
多在西風白下橋千里客遊仍暮景異鄉人事又今朝

老來未遣登臨懶盡醉東家綠玉瓢

寄謝子木

秦贅誰徵夢午年漢官倉氏豈淹賢荒涼秋浦時時酒
彷彿番江夜夜船湖海客身皆暮齒家山兒蕨等春拳
何時與和歸來賦白石黃沙未有田

寄題道吾山聞禪師竹院

道吾竹院芙蓉下老子藤床翡翠深過雨雷霆龍捧闥
滿天風露鶴當林此君靜對了不厭諸老清談亦許尋

他山祭酒聞還出何人載歌金玉音

送僧遊廬山

十八社人五老邊香爐紫煙誰為然山光水影江行日
風靜浪平船在天故里今逢霞外客孤篷曾坐月中禪
清吟一為浣塵土宛對三梁看瀑泉

廬山東南山水多石梁顛倒掛銀河仙燈夜半天人落
佛屋春深海客過五老芙蓉還好在陶公楊柳定如何
布帆又起江湖興應道西風動薜蘿

寄題金鷺泉石軒

金鷺泉石有深趣黃鶴仙人曾獨來巖雨溜雲青玉瀉
海天澄日碧蓮開山翁宴坐秋簾靜野客倦遊溪棹迴
幽徑依然生藥草他年從此入天台

題王元章梅

三年不見王徵士一見梅花如見人風致山陰頻夢夜
雪晴江上又逢春毫端只作尋常寫意度真同造化神
聞道耶溪新買宅想栽千樹作比隣

送張可道御史調西臺

西南兩府重威名江陝諸山慣送迎
行部渭涇寧有愧去奸鄉里若無情
最憐舊雪松能好故作春寒筍未生
為報同官楊伯起檜旁門巷尚餘清

題森碧軒卷

鳳語雙調碧玉笙羽裳羣擁翠霓旌
四時景物足蕭爽六月晝寒如太清
丁令回歸應發興項斯標格况知名
過門下馬豈無謂行酒賦詩殊有情

送清涼寺友上人歸永嘉

江心舊作野客宿石頭今逢開士歸半夜落潮隨棹發
十年殘夢逐雲飛相看接手話鄉里獨老忍淚沾裳衣
新春亦有還家願會過石室推煙扉

次韻具庵送湛淵上人永喜省師

早年為客曾遊處今日題詩却送僧珠箔濺巖看雪瀑
寶窗緣塔見天燈金仙爛熳開銀界玉女嬋娟倚翠層
禮罷阿師窮勝討諸峰歷歷漸攀登

送郭莞勾之西臺

南州待著騎驄馬西土今須聽鳳凰
風安浪花清度月秋先關樹早驚霜
汾陽宅畔槐應老泰華峰頭藕正香
願得盡分水雪片沈疴天下總堪留

題茅山彭道士畫梅花仙子

綠燕棲寒夜不飛洞天霜淨月流輝
夜深彷彿梅邊臥起撒青霞染素衣

次韻元宵雨雪

銀燭春光玉雪霄
翠簾歌管思寥寥
羅浮洞裏花如織
誰立寒香背小橋

題江村小景

野蓬忘世寒罽下
沙宮牽兒早餉遲
有客封侯玉門道
綠閨春恨繞花枝

馬德昭席上賦

江上重逢鄒大娘
桃花紅嫩染纖裳
蔓青溪上曾相見
猶記胡麻飯顆香

賦蕙花次韻岳上人

香滿松房夜月虛
紫蕤懸露泣方諸
湘魂故惱維摩定
起和離騷掃壁書

題李遵道山水

層峰高出雲樹外
飛溜直下天河懸
江南老客腸空斷
舊宅不歸三十年

酒間贈賈西白

思入東風白雨邊
暮雲春樹兩茫然
不因絳灌輕新進

未必長沙識少年

題美人卷

玉山橫管淚痕光
繡褥雙迴綵鳳凰
百巧心情題不得
九疑雲冷隔三湘

沙遠晴波淺漾金
魚苗初上小如針
將船載酒江頭飲
水柳千株滿岸陰

柳葉如眉枝似腰
贈郎輒挽最長條
條長即與儂心遠
不是為儂春態嬌

題楚江清曉圖

海色澄明霞欲生
白煙樓閣靜崢嶸
青楓江上船已發
苦竹嶺頭人未行

石倉歷代詩選卷二百四十九